

# Powšitkowne WOZJEWJENJA

njedźelu, 12. julija 2020

## Gig-Festival@home

Lubi młodostni, přez YouTube poskići so tutu njedźelu, 12. julija, wot 19 do 21 hodź. livestream Gig-festiwala. Tutón njemóže so koronoweje krizy dla w dotal znatej formje wotměć. Nikoho pak njeměło wottrašić, Boha zhromadnje chwalić a zhromadnosć hajić, byrnjež njesměš so tuchwilu we wulkich skupinach zetkawać. Móžna pak je tak mjenowana watchparty. K tomu móhli so w mjeńšich skupinkach zetkać a Gig-festiwal zhromadnje w livestreamje scěhować – cyle po Jězusowym wuprajenju: „Hdžež su dwaj abo tři w mojim mjenje zhromadzeni, tam sym ja mjez nimi.“ To budže we Worekleskim Don Boskowym domje a na Kulowskej Bosčanowej žurli móžno. Wobmjezowanych městnow dla měli so zajimcy přez link na stronje [www.posol.de](http://www.posol.de) přizjewić. Njeh sej na tutón wječor kóždy swój najlubši napoj a něšto ke chłóšćenju sobu přinjese. Jeli něchtó priwatnje watchparty přewjedže a by hišće kapacity za sobuhladarjow měł, njeh so z mailku pod [don.boskowy-dom@t-online.de](mailto:don.boskowy-dom@t-online.de) přizjewi. *Alena Šotćic*

## Putnikowanje do Krupki

Putnikowanje do Krupki budže wot njedźele do pjatka, 9. do 14. awgusta. Duchowny přewod změje farar Tomaš Dawidowski. Přenocowanje a kemše w Krupce stej móžnej. Zajimcy měli so hač do pjatka, 17. julija, w Chróscicach do lisciny zapisać, kotraž leži we wěži při zachodže do cyrkwy. Zhromadźizna putnikow, kiž je za wšitkich zawjazowaca, budže njedźelu, 19. julija, w Chróscicach. Wona započnje so z nysporom w 14.00 hodź.

## Z busom do Krupki kemši

Na putniku Božu mšu srjedu, 12. awgusta, w 10 hodź. w Krupce pojedže zaso bus. Štóz chcył sobu jěć, měł so najpozdzišo hač do pjatka, 31. julija, w Šmitec wozydłownistwje w Radworju přizjewić, telefonowe čisło (03 59 35) 28 60.

## Kofejownja swjateho Michała wotewrjena

Po zakónčenju twarskich džělow w klósterskej pjekarni je w klóstrje Marijinej hwězdze w Pančicach-Kukowje nětko nowa Kofejownja swjateho Michała wotewrjena. Wopytać móža ju hosćo wot wutory do njedźele wot 11 do 17 hodź. Klósterska pjekarnja pak wostanje chorosće dla znajmjeńša hišće hač do srjědz awgusta zawrjena.

## Nowy nabožny newsletter pola MDR

Redakcija „Nabožina a towaršnosć“ sćelaka MDR poskića zajimcam nětko newsletter. Jónu wob měsac chce w nim informacije k nabožnym swjedženjam, wo cyrkwinskih podawkach a aktualnych debatach zjimać kaž tež za wusyłanja a přenjesenje Božich službow wabić. Zajimcy móža sej newsletter na internetowej stronje MDR skazać. Link k tomu je pod [www.posol.de](http://www.posol.de) podaty.

## **Pytaja noweho tachantskeho kantora**

Budyska tachantska wosada pyta noweho kantora. Službu nastupić měł 1. nowembra. Do jeho nadawkow słuša mjez druhim přewjedženje a planowanje duchowneje hudźby a koncertow, prawidłowna služba jako organist a wumělske nawodowanje tachantskeho chóra. Wuměňenje přistajenja je mjez druhim wotzamknjeny studij katolskeje cyrkwinskeje hudźby. Zajimcy měli swoje powabjenje hač do wutory, 15. septembra, pisomnje w personalnym wotrjedže Drježdžanskeho biskopskeho ordinariata zapodać abo je na mailowu adresu [bewerbung@bddmei.de](mailto:bewerbung@bddmei.de) pósłać. Nadrobne wupisanje džěloweho městna je pod [www.posol.de](http://www.posol.de) wozjewjene.

## **W Smochćicach pytaja noweho nawodu kuchnje**

W Smochčanskim Domje biskopa Bena ma so městno kuchinskeho nawody 1. januara 2021 znowa wobsadzić. Swoje pisomne powabjenje měli zajimcy hač do póndžele, 27. julija, w personalnym wotrjedže Drježdžanskeho biskopskeho ordinariata zapodać abo je na mailowu adresu [bewerbung@bddmei.de](mailto:bewerbung@bddmei.de) pósłać. Nadrobne wupisanje džěloweho městna je pod [www.posol.de](http://www.posol.de) wozjewjene.

## **Zwjazk Carity pyta hladarjow**

Hornjołužiski zwjazk Carity z.t. pyta za swoju socialnu staciju w Kamjencu fachowy personal hladanja chorych ludźi. Nadrobne informacije k žadanjam na městno nańdu zajimcy na internetowej stronje [www.posol.de](http://www.posol.de). Požadać měli so zajimcy pola socialneje stacije Carity Budyšin-Kamjenc, Cyrkwinske naměsto 2 w 02625 Budyšinje abo z mailku pod [sst.bz.km@caritas-oberlausitz.de](mailto:sst.bz.km@caritas-oberlausitz.de)

## **Do „Božeje zahrody“ pojedźemy**

Putniska jězba wot štwórtka do póndžele, 30. julija do 3. awgusta, do tak mjenowaneje „Božeje zahrody“ so na kóždy pad přewjedže. Wopytamy na přikład baziliku Vierzehnheiligen, Bamberg a Bad Staffelstein. Předpisow korony dla pak budže program tróšku změnjeny. Zajimcy móža so hišće pola Šmitec wozydłownistwa w Radworju přizjewić, telefonowe čisło (03 59 35) 28 60.

*T. Kubašec*

## **Serbskorěčne zbožopřejne karty**

Budyska Serbska kulturna informacija na Póstowym naměsće poskićuje mjez druhim serbskorěčne zbožopřejne karty – ke křćeńcy, k přenjemu swjateho woprawjenju, firmowanju, wěrowanju kaž tež k narodninam abo šulskemu zachodej. Tež žarowanske karty tam maja.